



Broj/Број: 4/1-50-1-149-14/04
Sarajevo/Сапајево: 09.11.2004. godine

ZAPISNIK

Četrnaeste sjednice Zajedničke komisije Parlamentarne skupštine BiH za odbrambenu i sigurnosnu politiku i nadzor nad radom odbrambenih i sigurnosnih struktura na nivou BiH.

Prvi dio sjednice održan je 22.10. 2004. godine u vremenu od 10,00 do 12,00 sati.

Prvom dijelu sjednice su prisustvovali članovi Zajedničke komisije: Boško Šiljegović, Šefik Džaferović, Momčilo Novaković, Vinko Zorić, Adem Huskić, Seada Palavrić, Halid Genjac, Vinko Radovanović, Anto Spajić, Osman Brka i Branko Zrno.

Nije bio prisutan Mirko Blagojević.

Ovom dijelu sjednice su prisustvovali i poslanici Jozo Križanović i Zlatko Lagumdžija, Nikola Radovanović, Marina Pendeš i Enes Bećirbašić iz Ministarstva odbrane BiH, Christian Haupt iz OSCE-a.

Pored navedenih, bili su prisutni i, Dragica Hinić, privremeni sekretar Zajedničke komisije i Željko Grubešić, ekspert za pomoć u radu Zajedničke komisije.

Sjednicom je predsjedavao Boško Šiljegović.

Za raspravu na sjednici predložen je sljedeći

DNEVNI RED:

1. Verificiranje zapisnika 12. sjednice Zajedničke komisije;
2. Razmatranje Prijedloga zakona o učestvovanju pripadnika Oružanih snaga Bosne i Hercegovine, državnih službenika i ostalih zaposlenih u mirovnim operacijama i drugim aktivnostima u inostranstvu (predlađač: poslanik Momčilo Novaković);
3. Razmatranje inoviranog teksta Prijedloga rezolucije o odlaganju slanja svih BH vojnih i policijskih formacija u misije u inostranstvo do donošenja odgovarajućeg zakona i aktivnostima u ovoj oblasti (predlagači poslanici: Zlatko Lagumdžija, Jozo Križanović i Selim Bešlić);
4. Razmatranje Informacije o stanju popunjenosti ljudstvom Ministarstva odbrane BiH po zaključku 13. sjednice Zajedničke komisije (izvjestioci: ministar i zamjenici ministra odbrane BiH);
5. Razmatranje i sublimiranje poslaničkih prijedloga zaključaka proisteklih prilikom rasprave na Predstavničkom domu o Informaciji o stanju sigurnosti BiH;
6. Tekuća pitanja.

O predloženom dnevnom redu otvorena je rasprava, s obzirom da je **Seada Palavrić** imala primjedbu u odnosu na tačku 3. dnevnog reda. Po njenom mišljenju, na prethodnoj sjednici Zajedničke komisije doneseni su zaključci koji uslovljavaju raspravu o ovoj tački dnevnog reda, traženjem od Predsjedništva BiH kompletne informacije o dosadašnjim odlukama o upućivanju u

mirovne operacije pripadnika BiH van zemlje iprethodnom raspravom na sjednici oba doma. Stoga ovu tačku treba skinuti s dnevnog reda.

Šefik Džaferović istaknuo je da je Kolegij Predstavničkog doma već uputio takav zahtjev Predsjedništvu, te da su prethodni zaključci jasni i ne predstavljaju prepreku za razmatranje predložene tačke dnevnog reda na ovoj sjednici Komisije.

I **Halid Genjac** je mišljenja da prethodni zaključci ne isključuju jedan dugoga, te da se na ovoj sjednici treba voditi rasprava o tački 3. dnevnoga reda.

Po okončanoj raspravi, članovi Zajedničke komisije su sa 6 glasova protiv, 3 glasa za i 2 uzdržana glasa odbili prijedlog g-đe Palavrić za skidanje tačke 3. sa dnevnog reda ove sjednice.

Adem Huskić je potom predložio da se u okviru tačke 6. dnevnoga reda uvrsti razmatranje pitanja donošenja zaključka o obavezi informiranja Komisije o stanju popunjenosti ljudstvom SIPA-e i DGS-a, što su članovi Komisije jednoglasno usvojili.

Zlatko Lagumdžija je zamolio prisutne članove Komisije da se rasprava o tački 3. vodi prije navedenih tačaka dnevnoga reda s obzirom na obaveze koje ima ili da se obavjesti o vremenu rasprave po ovoj tački kako bi tada osigurao svoje prisustvo.

Protiv ovog prijedloga izjasnio se Osman Brka, dok je Vinko Zorić bio za prihvatanje prijedloga. Nakon kraće diskusije o ovom prijedlogu, članovi Komisije isti su odbili sa 5 glasova protiv, 4 glasa za i 2 uzdržana glasa.

Momčilo Novaković je predložio da se tačka 2. i 4. razmatraju jedna iza druge zbog obaveza ministra odbrane BiH, tako da bi se predložena tačka 3. razmatrala kao tačka 4. dnevnoga reda. Ovaj prijedlog usvojen je sa 7 glasova za, 2 glasa protiv i 2 uzdržana glasa.

Ad.1. Verificiranje zapisnika 12. sjednice Zajedničke komisije

Članovi Zajedničke komisije jednoglasno su verificirali zapisnik 12. sjednice Zajedničke komisije.

Ad.2. Razmatranje Prijedloga zakona o učestvovanju pripadnika Oružanih snaga Bosne i Hercegovine, državnih službenika i ostalih zaposlenih u mirovnim operacijama i drugim aktivnostima u inostranstvu (predlagač: poslanik Momčilo Novaković)

Boško Šiljegović ukratko je informirao o dosadašnjem toku razmatranja Prijedloga zakona. Istaknuo je da je u međuvremenu Ministarstvo odbrane BiH dostavilo svoje mišljenje o zakonu izraženo kroz pripremljeni inovirani tekst Prijedloga zakona u kome su ugrađeni amandmani ovog ministarstva.

Šefik Džaferović je istaknuo da je saglasan prihvatiti navedeni inovirani tekst dostavljen iz Ministarstva odbrane BiH, te da bi se na ovoj sjednici trebali o istom izjasniti jer se već jako dugo vodi rasprava o predloženom zakonu.

Momčilo Novaković također je mišljenja da je i za njega inovirani tekst Zakona prihvatljiv jer pomiruje odredbe Zakona o odbrani BiH i odredbe predloženog zakona. Međutim, po odredbama Poslovnika nemoguće je izjasniti se o njemu, s obzirom da nisu pripremljeni amandmani o kojima bi se Komisija izjasnila na ovoj sjednici.

Nikola Radovanović istaknuo je da su načinili prečišćeni tekst Prijedloga zakona, te da su napravili amandmane na radni tekst Prijedloga zakona, a ne na njegovu prvobitnu verziju. Svojim prijedlogom nastojali su postići kompromisno rješenje u odnosu na Zakon o odbrani BiH, koji precizira nadležnost Predsjedništva BiH, kao što su se željeli ispoštovati i standardi NATO-a u pogledu efikasnog i ekonomičnog lanca komandovanja i rukovođenja.

Vinko Radovanović mišljenja je da, ako se Zajednička komisija izjasni o prihvatanju ovako inoviranog teksta Prijedloga zakona, treba sačiniti amandmane koji odgovaraju tom tekstu i o njima se potom izjasniti saglasno odredbama poslovnika.

Šefik Džaferović saglasan je sa mišljenjem prethodnika i predlaže da se to učini odmah i izjasni na ovoj sjednici.

Seada Palavrić upitala je ministra odbrane BiH da li je o inoviranom tekstu zatraženo mišljenje članova Predsjedništva, na što je dobila negativan odgovor uz obrazloženje da Ministarstvo nije u obavezi tražiti takvo mišljenje.

Momčilo Novaković potom je postavio nekoliko konkretnih pitanja vezanih za inovirani tekst prijedloga zakona. Mišljenja je da se u članu 6. koji regulira nadležnost Parlamentarne skupštine BiH, treba promijeniti formulacija u smislu utvrđivanja obaveze Parlamenta da zasjeda i odlučuje o odlukama iz prethodnih članova. Dalje, u članu 4. potrebno je dodati i tačku 4. iz člana 2., dok se u čl. 10 i 11. uopće ne pominju policijski i državni službenici i ostali, koji bi se trebali naći u ovim članovima.

Nikola Radovanović odgovorio je da su tačke u članovima 4. i 5. namjerno razdvojene, jer se npr. u okviru NATO-a može organizirati određen kurs o kome ne treba odlučivati Predsjedništvo.

Također, postoji mogućnost upućivanja pojedinaca o čemu odluku donosi nadležni ministar a ne Predsjedništvo. I u čl.10. i 11. učinjeno je isto, s obzirom da postoji razlika u slučaju upućivanja Oružanih snaga BiH od upućivanja ostalih kategorija, jer je Predsjedništvo vrhovni komandant Oružanih snaga BiH, a što nije u ostalim slučajevima.

Boško Šiljegović predložio je da se članovi Komisije opredjele za predloženi inovirani tekst Zakona. U tom slučaju potrebno je sačiniti amandmane koje bi neko od članova Komisije predložio kao svoje. Dalje bi bilo dobro da svi predlagači ranijih amandmana iste povuku iz procedure.

Adem Huskić i Momčilo Novaković koji ima pismeno ovlaštenje predlagača amandmana Nenada Mišića da odlučuje u njegovo ime, saglasili su se sa prijedlogom i povukli ranije uložene amandmane, dok su **Seada Palavrić i Vinko Zorić** ostali kod ranije predloženih amandmana.

Vinko Zorić istaknuo je da su amandmani koje je on predložio amandmani Ministarstva sigurnosti i da ih stoga ne može povući dok se ovlašteni predstavnik ovog ministarstva ne izjasni o inoviranom tekstu Zakona. Tek po takvom izjašnjenju on može povući navedene amandmane.

Boško Šiljegović, Šefik Džaferović, Adem Huskić predložili su da se na predmetnoj sjednici članovi Komisije izjasne o inoviranom tekstu Zakona. Adem Huskić je također istaknuo da će on preuzeti nove amandmane.

Momčilo Novaković i Vinko Radovanović su bili mišljenja da je neophodno ispoštovati odredbe poslovnika koji pretpostavlja postojanje i glasanje o amandmanima na prvobitni tekst Prijedloga zakona.

Nakon desetominutne pauze, **Boško Šiljegović** informirao je Komisiju o dva prijedloga za dalji rad o predloženom zakonu. Jedan prijedlog ide u pravcu izjašnjavanja o inoviranom tekstu Prijedloga zakona na predmetnoj sjednici Komisije, a da se naknadno sačine amandmani koji odgovaraju tom tekstu. Drugim prijedlogom bilo bi zaduženo Ministarstvo odbrane BiH da za nekoliko dana sačini amandmane koji odgovaraju inoviranom tekstu, nakon čega bi se članovi Komisije izjasnili o istim, i Zakonu u cjelini. Drugi prijedlog također ide u smjeru povlačenja svih ranije uložених amandmana. Ukoliko neko od predlagača ne želi odustati od ranijih amandmana, članovi Komisije izjasnili bi se i o tim amandmanima.

Halid Genjac je predložio da se prilikom izrade amandmana i konačnog teksta Zakona obavezno konsultira Ministarstvo sigurnosti koje nije upoznato sa inoviranim tekstom, s obzirom na status kategorije osoba koje su u nadležnosti ovog ministarstva. Stoga on nije za prvi prijedlog i mišljenja je da se na narednoj sjednici Komisije treba izjašnjavati o Zakonu.

Seada Palavrić saglasna je sa mišljenjem g-dina Genjca, da se prihvati drugi prijedlog, s tim da je isti dopunila obavezom sekretara Komisije da pomogne predstavnicima Ministarstva odbrane u pripremi amandmana koji odgovaraju inoviranom tekstu Zakona. Naredna sjednica Komisije po njenom mišljenju mogla bi se održati tek iza 01.11. 2004. godine zbog ranije preuzetih obaveza.

Osman Brka je također saglasan sa drugim prijedlogom, s tim da je predložio da i potpisnik novih amandmana koji budu sačinjeni učestvuje u njihovoj izradi.

Po okončanoj raspravi članovi Zajedničke komisije usvojili su **zaključak** kojim su prihvatili od Ministarstva odbrane inovirani tekst Zakona, te Ministarstvo odbrane BiH i sekretara Komisije zadužili da do 01.11.2004. godine sačine amandmane koji odgovaraju navedenom tekstu, a koje će zvanično u proceduru predložiti Adem Huskić. Prilikom izrade amandmana treba vidjeti da li neki

od ranije predloženih amandmana odgovara inoviranom tekstu, kako bi se i ostali predlagači amandmana koji nisu iste povukli, doveli u ravnopravan položaj. Također, u toku procesa izrade amandmana, potrebno je izvršiti konsultacije o inoviranom tekstu Zakona, sa predstavnicima Ministarstva sigurnosti BiH, s obzirom da Zakon tretira i kategorije osoba za koje je nadležno ovo ministarstvo.

Članovi Zajedničke komisije dogovorili su se da sjednica Komisije bude održana iza 01.11.2004. godine.

Ad.3. Razmatranje Informacije o stanju popunjenosti ljudstvom Ministarstva odbrane BiH po zaključku 13. sjednice Zajedničke komisije

Boško Šiljegović informirao je prisutne da je Ministarstvo odbrane BiH po zaključku prethodne sjednice Zajedničke komisije dostavilo kompletnu Informaciju o stanju popunjenosti ljudstvom Ministarstva odbrane BiH.

Na konstataciju **Halida Genjca i Vinka Radovanovića** da je Informacija dostavljena 10.09.2004. godine, te da je prilično zastarjela, **Nikola Radovanović** je istaknuo da je 20.10.2004. godine dostavljena nova informacija sa svim podacima.

Potom je **Anto Spajić** predložio, da se zbog značaja ovog pitanja, informacija o popunjenosti ljudstvom razmatra kontinuirano.

Nikola Radovanović potom je zamolio Zajedničku komisiju za ujednačen tretman Ministarstva odbrane BiH sa ostalim ministarstvima, s obzirom da je ovo ministarstvo do sada Komisiji dostavilo niz akata za razliku od drugih ministarstava.

Članovi Zajedničke komisije izrazili su razumjevanje za ovaj zahtjev i istaknuli da će se i od drugih ministarstava u zavisnosti od utvrđenih obaveza, tražiti odgovarajuće informacije. Kao primjer naveli su Ministarstvo sigurnosti BiH od kojeg su već tražene odgovarajuće informacije.

Nakon okončane rasprave, Informacija o stanju popunjenosti ljudstvom Ministarstva odbrane BiH od 10.09.2004. godine, primljena je k znanju, dok će Informacija dostavljena 20.10.2004. godine biti razmatrana na narednoj sjednici prilikom razmatranja cjelokupnog Izvještaja o stanju u Ministarstvu odbrane BiH. Također, usvojeni su sljedeći **zaključci**:

1. Informacije o popunjenosti ljudstvom Ministarstva odbrane, razmatrat će se kontinuirano, zbog značaja ovog pitanja u procesu priključenja Bosne i Hercegovine Partnerstvu za mir.
2. Agenciji za državnu službu i Ministarstvu odbrane BiH sugerira se da u što kraćem roku okončaju postupak prijema lica u ovo ministarstvo, na osnovu okončanog javnog konkursa.

Ad.4. Razmatranje inoviranog teksta Prijedloga rezolucije o odlaganju slanja svih BH vojnih i policijskih formacija u misije u inostranstvo do donošenja odgovarajućeg zakona i aktivnostima u ovoj oblasti (predlagači poslanici: Zlatko Lagumdžija, Jozo Križanović i Selim Bešlić)

Boško Šiljegović predložio je da se, zbog ranije preuzetih obaveza članova Komisije u toku dana, ova tačka dnevnoga reda razmatra na nastavku 14. sjednice Komisije, kao i Prijedlog zakona g-dina Novakovića, čije razmatranje u okviru tačke 2. dnevnog nije okončano na ovoj sjednici, što su članovi Zajedničke komisije jednoglasno usvojili.

Ad.5. Razmatranje i sublimiranje poslaničkih prijedloga zaključaka proisteklih prilikom rasprave na Predstavničkom domu o Informaciji o stanju sigurnosti BiH

Boško Šiljegović informirao je prisutne da članovi Radne grupe Komisije, po njegovom saznanju, nisu još uvijek obavili utvrđeni zadatak, tako da se ovo pitanje ne može razmatrati na predmetnoj sjednici.

Vinko Zorić, kao član Radne grupe, predložio je da se ovo pitanje ne uvrštava u dnevni red narednih sjednica Komisije ukoliko ne bude pripremljen prijedlog zaključaka na vrijeme.

Nakon kraće rasprave, navedena tačka nije razmatrana iz navedenih razloga.

Ad.6. Tekuća pitanja

a) Boško Šiljegović informirao je prisutne da je u pisanoj formi dostavljen Plan aktivnosti Zajedničke komisije do kraja tekuće godine, o kome je već vođena rasprava na prethodnoj sjednici. Predmetni plan aktivnosti članovi Zajedničke komisije prihvatili su jednoglasno.

b) Na prijedlog Adema Huskića, jednoglasno je usvojen zaključak kojim se Ministarstvo sigurnosti obavezuje da do naredne sjednice Zajedničke komisije dostavi Informaciju o stanju popunjenosti ljudstvom SIPA-e i DGS-a.

Ovom prilikom, Ljiljana Trišić iz Ministarstva sigurnosti BiH, informirala je da je Ministarstvo sačinilo novu Informaciju o stanju sigurnosti BiH za prvih šest mjeseci ove godine koja će se brzo naći u parlamentarnoj proceduri.

c) Željko Grubešić pročitao je pismo zahvale Ministarstvu odbrane FBiH i Vojsci FBiH radi dobre organizacije i prijema članova Zajedničke komisije prilikom protekle posjete, što je primljeno k znanju.

d) Boško Šiljegović, prilikom informiranja o Predgledu prisustva članova Zajedničke komisije sjednicama, predložio je da se u evidenciji navede i prisustvo članova prilikom posjeta ostalim institucijama, kao što je posjeta Ministarstvu odbrane RS i Ministarstvu odbrane FBiH, jer su to također redovne aktivnosti.

Seada Palavrić je predložila da se u evidenciji navede i prisustvo prilikom posjeta stranih delegacija.

Navedeni prijedlozi jednoglasno su usvojeni.

e) Kako je evidentno da član ove komisije Mirko Blagojević, kontinuirano ne prisustvuje sjednicama, **zaključeno** je da se inicira Predstavničkom domu postupak njegovog razrješenja članstva u Komisiji, što je jednoglasno usvojeno. Uz navedenu inicijativu Domu će se dostaviti i Pregled prisustva članova sjednicama Komisije.

Po okončanju rasprave o tačkama dnevnog reda Boško Šiljegović predložio je da se, zbog velike zainteresiranosti sredstava informiranja, odrede članovi Komisije koji bi dali odgovarajuću izjavu po okončanju sjednice Komisije. Kako je prijedlog jednoglasno prihvaćen, za obraćanje predstavnicima sredstava informiranja određeni su Momčilo Novaković, Halid Genjac i Marina Pendeš.

Nastavak četrnaeste sjednice Zajedničke komisije održan je 09.11. 2004. godine u vremenu od 10,00 do 11,00 sati.

Nastavku sjednice prisustvovali su članovi Zajedničke komisije: Boško Šiljegović, Šefik Džaferović, Momčilo Novaković, Vinko Zorić, Adem Huskić, Halid Genjac, Vinko Radovanović, Anto Spajić, Mirko Blagojević i Branko Zrno.

Iz opravdanih razloga nisu prisustvovali i Seada Palavrić i Osman Brka.

Nastavku sjednice su prisustvovali i gosti: poslanik Jozo Križanović, Nikola Radovanović, Marina Pendeš i Enes Bećirbašić iz Ministarstva odbrane BiH, Pešto Emin iz Ministarstva sigurnosti BiH, Alma Čolo iz Predsjedništva BiH, Mudžahid Hasanbegović iz OHR-a, Christian Haupt iz OSCE-a, te eksperti Parlamenta FBiH Neven Kazazović i Enes Zukanović.

Pored navedenih, nastavku sjednice prisustvovali su i Dragica Hinić, privremeni sekretar Zajedničke komisije i Željko Grubešić, ekspert za pomoć u radu Zajedničke komisije.

Sjednicom je predsjedavao Boško Šiljegović.

Na nastavku sjednice razmatrane su slijedeće tačke dnevnog reda:

1. Razmatranje Prijedloga zakona o učestvovanju pripadnika Oružanih snaga Bosne i Hercegovine, državnih službenika i ostalih zaposlenih u mirovnim operacijama i drugim aktivnostima u inostranstvu (predlagač: poslanik Momčilo Novaković);
2. Razmatranje inoviranog teksta Prijedloga rezolucije o odlaganju slanja svih BH vojnih i policijskih formacija u misije u inostranstvo do donošenja odgovarajućeg zakona i aktivnostima u ovoj oblasti (predlagači poslanici: Zlatko Lagumdžija, Jozo Križanović i Selim Bešlić).

Ad.1. Razmatranje Prijedloga zakona o učestvovanju pripadnika Oružanih snaga Bosne i Hercegovine, državnih službenika i ostalih zaposlenih u mirovnim operacijama i drugim aktivnostima u inostranstvu (predlagač: poslanik Momčilo Novaković)

Nakon kraćeg uvodnog informiranja o dosadašnjem radu vezanom za razmatranje Prijedloga zakona, **Boško Šiljegović** istaknuo je da su u skladu sa zaključkom prvog dijela sjednice, u saradnji predstavnika Ministarstva odbrane BiH i sekretara Zajedničke komisije, sačinjeni amandmani koji odgovaraju prihvaćenom tekstu Zakona sa kojim je saglasno Ministarstvo odbrane BiH. Nakon konsultacija sa Ministarstvom sigurnosti BiH, u pregledu usaglašenih amandmana u okviru tri člana predložene su alternative, s obzirom da ti članovi reguliraju status osoba za koje je nadležno ovo ministarstvo.

Nakon uvodnog izlaganja članovi Zajedničke komisije jednoglasno su usvojili principe, a potom pristupili izjašnjavanju o predloženim amandmanima, kako slijedi:

Amandman 1. Seade Palavrić usvojen je jednoglasno, u slijedećem tekstu:

U cijelom tekstu Prijedloga zakona riječi “mirovne operacije” zamjenjuju se riječima “operacije podrške miru” u odgovarajućem padežu.

Amandman 2. Seade Palavrić usvojen je jednoglasno, u slijedećem tekstu:

U cijelom tekstu Prijedloga zakona riječ “direktori” zamjenjuje se riječju “rukovoditelji” u odgovarajućem padežu.

Amandman 3. Seade Palavrić usvojen je jednoglasno, u slijedećem tekstu:

U svim članovima Prijedloga zakona koji navode riječi “državni službenici i zaposleni”, ispred navedenih riječi dodaju se riječi “policijski službenici”.

Amandman 4. Seade Palavrić usvojen je jednoglasno, u slijedećem tekstu:

U preambuli Prijedloga zakona, u drugom redu riječ “Parlamentarnog” zamjenjuje se riječju “Zastupničkog”.

Amandman 5.-S.Palavrić odbijen je s 1 glasom za i 9 glasova protiv.

Amandman 1.Vinka Zorića usvojen je jednoglasno u slijedećem tekstu:

Naziv Prijedloga zakona mijenja se i glasi:

“Zakon o učestvovanju pripadnika Oružanih snaga Bosne i Hercegovine, policijskih službenika, državnih službenika i ostalih zaposlenih u mirovnim operacijama i drugim aktivnostima u inostranstvu”.

Amandman 1. Adema Huskića usvojen je jednoglasno u slijedećem tekstu:

U prvom redu člana 1. iza riječi “pripadnika” dodaju se riječi “i jedinica”, a iza riječi “zaposlenih” dodaju se riječi u zagradi “(u daljem tekstu: predstavnici BiH)”.

Amandman 2.Vinka Zorića usvojen je jednoglasno u slijedećem tekstu:

U članu 1. Prijedloga zakona iza riječi “pripadnika Oružanih snaga Bosne i Hercegovine,” dodaju se riječi “policijskih službenika,”.

Amandman 2.Adema Huskića , uz modifikaciju tačke 4., usvojen je jednoglasno u slijedećem tekstu:

Član 2. mijenja se i glasi:

“Član 2.

U smislu odredbi ovog zakona operacije za podršku miru i druge aktivnosti podrazumijevaju:

1. Operacije sprečavanja sukoba:
 - a) posmatračke misije;

- b) preventivno raspoređivanje snaga;
 - c) obuka za operacije podrške miru.
2. Operacije očuvanja mira:
- a) nadgledanje primirja i prekida vatre;
 - b) razdvajanje snaga;
 - c) razoružanje i demobilizacija.
3. Operacije uspostavljanja, provedbe i izgradnje mira:
- a) kontrola provođenja embarga i sankcija;
 - b) zaštita ljudskih prava;
 - c) vojna pomoć civilnim vlastima;
 - d) stvaranje sigurnosnog okruženja za provođenje humanitarnih operacija.
4. Učestvovanje u aktivnostima međunarodnih sigurnosnih i odbrambenih organizacija, kojima je Bosna i Hercegovina pristupila na osnovu međunarodnih ugovora, a koje ne podrazumjeva aktivnosti iz st.1.,2.,3. i 7. ovog člana.
5. Humanitarne operacije kao samostalne operacije u slučaju prirodnih, tehničko-tehnoloških ili ekoloških nesreća.
6. Učestvovanje u vojnim vježbama i obuci na osnovu međudržavnih ugovora;
7. Otklanjanje posljedica terorističkih napada .”

Amandman 3. Adema Huskića usvojen je jednoglasno u slijedećem tekstu:

Iza člana 2. dodaje se novi član 2.a) koji glasi:

Član 2.a)

Pripadnici i jedinice Oružanih snaga Bosne i Hercegovine, policijski službenici, državni službenici i zaposlenici koji se upućuju u inostranstvo radi učešća u operacijama podrške miru i drugim aktivnostima, imaju obavezu da:

- zastupaju interese Bosne i Hercegovine u skladu sa mandatom misije,
- savjesno izvršavaju svoje zadatke i obaveze i poštuju lanac rukovođenja i komandovanja,
- sprovode i poštuju norme međunarodnog prava,
- snose troškove proistekle iz neopravdanog prekida angažiranja u misiji,
- ukoliko počinu disciplinski prestup, učine prekršajno ili krivično djelo, podliježu odgovornosti po zakonima Bosne i Hercegovine i međunarodnim konvencijama.

Amandman 4. Adema Huskića usvojen je jednoglasno u slijedećem tekstu:

Naslov II. mijenja se i glasi:

“II- POSTUPAK DONOŠENJA ODLUKE O UČEŠĆU PREDSTAVNIKA BiH U OPERACIJAMA PODRŠKE MIRU I DRUGIM AKTIVNOSTIMA U INOSTRANSTVU”

Amandman 5. Adema Huskića usvojen je jednoglasno, uz modificiranje koje se odnosi na brisanje tač.4. u stavu 1. ovog člana, u slijedećem tekstu:

Član 3. mijenja se i glasi:

“Član 3.

Odluku o učešću predstavnika BiH u aktivnostima iz člana 2. tačke 1., 2., 3., i 7. donosi Predsjedništvo BiH .

Prije donošenja odluke iz stava 1. ovog člana, Predsjedništvo BiH će od Vijeća ministara BiH pribaviti ocjenu opravdanosti učešća u konkretnoj operaciji. Ocjena sadrži vanjskopolitičke, pravne, sigurnosne, odbrambene i finansijske aspekte. Vijeće ministara BiH dužno je dostaviti traženu ocjenu u roku od 60 dana od dana dostavljanja zahtjeva.

Vijeće ministara BiH može na prijedlog nekog od ministarstava ili nadležnih državnih i entitetskih organa, odlučiti da pred Predsjedništvom BiH pokrene obrazloženu inicijativu o učešću u operacijama podrške miru.»

Amandman 6. Adema Huskića usvojen je jednoglasno u slijedećem tekstu:

Iza člana 3. dodaje se novi čl. 3.a), 3.b) i 3.c), koji glase:

«Član 3.a)

Odluku o učešću predstavnika BiH u aktivnostima iz člana 2. tač. 4., 5. i 6., donose ministarstva Vijeća ministara BiH čiji se pripadnici upućuju u konkretnu operaciju podrške miru.

Član 3.b)

Parlamentarna skupština BiH dužna je razmatrati odluke Predsjedništva BiH o učešću pripadnika Oružanih snaga Bosne i Hercegovine, policijskih službenika, državnih službenika i zaposlenih u operacijama podrške miru u roku od 60 dana od dana donošenja odluke. Ako Parlamentarna skupština BiH ne potvrdi odluku Predsjedništva BiH u datom roku, odluka će se smatrati odbijenom i obustavit će se sve aktivnosti na njenom provođenju.

Član 3.c)

Kod donošenja odluka o učešću predstavnika BiH, u operacijama podrške miru i drugim aktivnostima, uvažavaju se slijedeći kriteriji:

- a) državni interes BiH,
- b) postojanje međunarodne obaveze Bosne i Hercegovine preuzete međunarodnim i međudržavnim ugovorima i sporazumima,
- c) definirana pravila angažiranja sa jasnim ciljevima, definirani finansijski izdaci.”

Amandman 3. predlagač Vinko Zorić je povukao.

Amandman 7. Adema Huskića usvojen je jednoglasno u slijedećem tekstu:

Ispred člana 4. Prijedloga zakona, dodaje se novi se naslov III. koji glasi:

“III-POSTUPAK DONOŠENJA NAREDBE O UPUĆIVANJU PRIPADNIKA I JEDINICA ORUŽANIH SNAGA BOSNE I HERCEGOVINE U INOSTRANSTVO ZBOG UČESTVOVANJA U OPERACIJAMA PODRŠKE MIRU I DRUGIM AKTIVNOSTIMA”.

Amandman 8. Adema Huskića usvojen je jednoglasno u slijedećem tekstu:

Član 4. mijenja se i glasi:

“Član 4.

Pripadnici Oružanih snaga BiH upućuju se u operacije podrške miru i druge aktivnosti u inostranstvo naredbom ministra odbrane BiH, te na osnovu ovog zakona i Zakona o odbrani BiH. Akta iz stava 1. ovog člana, institucije i komande u sistemu odbrane BiH realizovat će svojim naredbama neposredno, u skladu sa ovlaštenjima koja imaju u operativnom i administrativnom lancu komandovanja.”

Amandman I. Miloša Jovanovića predlagač je povukao.

Amandman 9. Adema Huskića usvojen je jednoglasno u slijedećem tekstu:

Podnaslov ispred člana 5. Prijedloga zakona “Upućivanje radi vježbe i obuke na osnovu međunarodnih ugovora”, briše se.

Amandman 10. Adema Huskića usvojen je jednoglasno u slijedećem tekstu:

Član 5. Prijedloga zakona mijenja se i glasi:

“Član 5.

Prije donošenja naredbe o upućivanju jedinice Oružanih snaga Bosne i Hercegovine u inostranstvo radi učešća u aktivnostima iz člana 2. tačka 4. ovog zakona, ministar odbrane BiH pribavit će odobrenje Predsjedništva BiH za učešće u svakoj konkretnoj aktivnosti.»

Amandman 11. Adema Huskića, uz modifikaciju člana 5.b), usvojen je jednoglasno u slijedećem tekstu:

Iza člana 5. dodaju se novi čl.5.a) i 5.b) koji glase:

“Član 5.a)

O donošenju naredbe o učešću pripadnika i jedinica Oružanih snaga BiH, u humanitarnim operacijama po članu 2. tačka 5. ovog zakona, ministar odbrane BiH neodložno će izvjestiti Vijeće ministara BiH, Predsjedništvo BiH i Parlamentarnu skupštinu BiH. Ukoliko Predsjedništvo BiH i Parlamentarna skupština BiH ne odobre aktivnosti u roku od 30 dana od dana donošenja naredbe, ministar odbrane BiH dužan je donijeti naredbu o trenutnom povlačenju pripadnika i jedinica Oružanih snaga BiH u Bosnu i Hercegovinu.

Član 5.b)

Pripadnici i jedinice Oružanih snaga Bosne i Hercegovine, učestvuju u redovnoj obuci i vježbama po članu 2. tačka 6. na osnovu godišnjeg plana obuke i vježbi u inostranstvu. Ministar odbrane BiH će najkasnije do 15. septembra tekuće godine upoznati Vijeće ministara Bosne i Hercegovine sa godišnjim planom vježbi i obuke za narednu kalendarsku godinu i uputiti će neodložno informaciju o godišnjem planu Parlamentarnoj skupštini BiH i Predsjedništvu.”

Amandman 6. Seade Palavrić odbijen je jednoglasno.

Amandman 12. Adema Huskića usvojen je jednoglasno u slijedećem tekstu:

Postojeći podnaslov koji se nalazi iza postojećeg člana 5. Prijedloga zakona , «Promjena mandata i povlačenje u slučaju vanrednih okolnosti» , briše se .

Amandman 13. Adema Huskića usvojen je jednoglasno u slijedećem tekstu:

Član 6. Prijedloga zakona, briše se.

Amandman 4.Vinka Zoria usvojen je jednoglasno u slijedećem tekstu:

U naslovu glave III. Prijedloga zakona , na početku teksta dodaje se riječ: “POSTUPAK”.

Amandman 14. Adema Huskića , uz modifikaciju ,usvojen je jednoglasno u slijedećem tekstu:

Postojeća glava III. postaje glava IV., a u tekstu naslova iza riječi “odluke” dodaju se riječi “odnosno naredbe”.

Amandman 15. Adema Huskića usvojen je jednoglasno u slijedećem tekstu:

Član 7. mijenja se i glasi:

“Član 7.

Nadležni ministri i rukovoditelji državnih upravnih organizacija vodeći računa o stručnosti, zahtjevima misije i nacionalnoj zastupljenosti, određuju nacionalni sastav, vrstu opreme, kontingent za smjenu i druga pitanja vezana za izvršenje misije.”

Amandman 5. predlagač Vinko Zorić je povukao.

Amandman 7. Seade Palavrić ,odbijen je sa 1 glasom za i 8 glasova protiv.

Amandman 6.Vinka Zorića usvojen je jednoglasno u slijedećem tekstu:

Član 8. mijenja se i glasi:

“Policijski službenici, državni službenici i ostali zaposleni upućuju se u mirovne operacije i druge aktivnosti u inostranstvu na osnovu odluke nadležnog ministra, odnosno direktora državne upravne organizacije u skladu s ovim zakonom.”

Amandman 16.Adema Huskića , uz modifikaciju člana 8.a), koja se odnosi na zamjenu riječi “Oružanih snaga” riječju “predstavnik”, a na osnovu prijedloga Ministarstva sigurnosti BiH, usvojen je jednoglasno u slijedećem tekstu:

Iza člana 8. dodaje se naslov nove glave V. koji glasi:

«PROMJENA MANDATA I POVLAČENJE U SLUČAJU VANREDNIH OKOLNOSTI»

Iza naslova nove glave V. , dodaje se novi član 8.a) koji glasi:

“Član 8.a)

Ukoliko u toku provođenja misije dođe do promjene njenog karaktera iz koje proističe ozbiljno ugrožavanje interesa Bosne i Hercegovine, ili neprihvatljiv rizik za živote predstavnika BiH u operacijama podrške miru i drugim aktivnostima, Predsjedništvo BiH može donijeti odluku o trenutnom povlačenju dijela ili cjelokupnog upućenog kontingenta predstavnika Bosne i Hercegovine.”

Amandman 17. Adema Huskića usvojen je jednoglasno u slijedećem tekstu:

U postojećem naslovu glave IV., koji postaje glava VI., ispred riječi “Izvještavanje” dodaju se riječi “Komandovanje i”.

Iza postojećeg naslova IV. dodaje se novi član 8.b) , koji glasi:

“Član 8.b)

Predstavnici BiH u operacijama podrške miru i drugim aktivnostima u inostranstvu, za vrijeme priprema, upućivanja i izvršavanja misije potčinjeni su komandantu-šefu misije kojeg imenuje organ nadležan za donošenje odluke o učešću.

Komandant-šef misije u ispunjavanju svojih obaveza i zadataka potčinjen je komandi multinacionalnih snaga i organima vlasti Bosne i Hercegovine.

U slučaju da su dobijeni zadaci i obaveze u suprotnosti sa zakonom ili odlukama nadležnog organa BiH, komandant-šef misije postupa po zakonima Bosne i Hercegovine, ako međunarodnim ugovorom nije drugačije određeno.”

Amandman 18. Adema Huskića usvojen je jednoglasno u slijedećem tekstu:

Član 9. Prijedloga zakona mijenja se i glasi:

“Član 9.

Predsjedništvo BiH i Vijeće ministara BiH podnose redovni izvještaj Parlamentarnoj skupštini BiH dva puta godišnje, a vanredni izvještaj prema potrebi i zahtjevu od strane Parlamentarne skupštine BiH.

Izvještaj Parlamentarnoj skupštini BiH treba da sadrži informacije o:

- karakteru misije ili aktivnosti,
- strukturi snaga,
- stanju na terenu,
- rezultatima misije. “

Amandman 19. Adema Huskića usvojen je jednoglasno u slijedećem tekstu:

Iza člana 9. dodaje se novi član 9.a) koji glasi:

“Član 9.a)

Parlamentarna skupština BiH će dva puta godišnje razmatrati učešće predstavnika BiH u operacijama podrške miru, a do kraja mjeseca septembra tekuće godine donositi odluku o opravdanosti i nivou učešća u operacijama podrške miru za narednu godinu.”

Amandman 8. Seade Palavrić odbijen je jednoglasno.

Amandman 7. predlagač Vinko Zorić je povukao.

Amandman 9. Seade Palavrić usvojen je jednoglasno u slijedećem tekstu:

U čl.10. i 13. Prijedloga zakona, riječi “ostali zaposleni” u odgovarajućem padežu zamjenjuju se riječju “zaposlenici” u odgovarajućem padežu.

Amandman 8. Vinka Zorića usvojen je jednoglasno u slijedećem tekstu:

U članu 10. Prijedloga zakona iza riječi “pripadnika oružanih snaga Bosne i Hercegovine” i zareza dodaju se riječi: “policijskih službenika”.

Amandman 9. predlagač Vinko Zorić je povukao.

Amandman 10. predlagač Vinko Zorić je povukao.

Amandman 10. Seade Palavrić usvojen je jednoglasno u slijedećem tekstu:

U čl.11. i 12. Prijedloga zakona, riječ “direktori” zamjenjuje se riječju “rukovoditelji”, na jezicima naroda.

Amandman 11. predlagač Vinko Zorić je povukao.

Amandman 12.Vinka Zorića usvojen je jednoglasno u slijedećem tekstu:

Iza nove poglavlja VI. dodaje se novi član 12. a) Prijedloga zakona koji glasi:

“Član 12.a)

Pripadnicima Oružanih snaga Bosne i Hercegovine, policijskim službenicima, državnim službenicima i zaposlenicima upućenim u inostranstvo radi učešća u mirovnim operacijama i drugim aktivnostima garantira se:

1. diplomatska i pravna pomoć i zaštita Bosne i Hercegovine;
2. zaštita ljudskih prava zagarantiranih Ustavom Bosne i Hercegovine;
3. pravo na plaćeno odustvo za vrijeme trajanja mirovne operacije kao i druga prava koja proizilaze iz radnog statusa;
4. povratak na ranije radno mjesto, odnosno raspoređivanje na drugo radno mjesto u skladu sa stručnom spremom i činom odnosno zvanjem.
5. pravo na naknadu štete u slučaju tjelesnog oštećenja ili gubitka života, koja će se utvrditi posebnim propisom.

Lica iz stava 1. ovog člana dužna su u roku od 30 dana od dana okončanja operacije podrške miru, javiti se nadležnom ministarstvu ili upravnom organu odnosno upravnoj organizaciji radi nastavljanja radnog odnosa.

Prava iz stava 1. tač. 3. i 4. navedena lica ostvaruju kod nadležnog ministarstva ili upravnog organa odnosno upravne organizacije.”

Amandman 13.Vinka Zorića usvojen je jednoglasno u slijedećem tekstu:

U članu 13. Prijedloga zakona iza riječi “Oružanih snaga Bosne i Hercegovine,” dodaju se riječi “policijski službenici,”.

Amandman 11. Seade Palavrić odbijen je jednoglasno.

Amandman 14. predlagač Vinko Zorić je povukao .

Amandman 20. Adema Huskić usvojen je jednoglasno u slijedećem tekstu:

U članu 14. stav 1. Prijedloga zakona, riječi “u svim vrstama operacija” zamjenjuju se se riječju “operacijama”.

Amandman 12.- S.Palavrić jednoglasno je odbijen.

Amandman 15. Vinka Zorića usvojen je jednoglasno u slijedećem tekstu:

U članu 15. ispred riječi “Državni službenici” dodaju se riječi i zarez: “Policijski službenici,”.

Amandman 21. Adema Huskića usvojen je jednoglasno u slijedećem tekstu:

U članu 15., riječi “i nenaoružanih”, brišu se.

Amandman 22.Adema Huskića usvojen je jednoglasno u slijedećem tekstu:

Poglavlje VII. i član 16. brišu se, uz odgovarajuću numeraciju narednih poglavlja i članova.

Amandman 16.Vinka Zorića usvojen je jednoglasno u slijedećem tekstu:

U članu 17. Prijedloga zakona riječi “u skladu sa Zakonom o odbrani Bosne i Hercegovine” mijenjaju se i glase:

“iz Budžeta institucija Bosne i Hercegovine”

Amandman 23. Adema Huskića usvojen je jednoglasno u slijedećem tekstu:

Postojeće glave V. i VI. pomjeraju se uslijed dodavanja novih glava i postaju glave VII. i VIII., a glava VIII. i IX. postaju glava IX. i X.

Također, uslijed dodavanja novih članova u postojeći tekst Prijedloga zakona, uradit će se odgovarajuća numeracija članova po usvajanju Prijedloga zakona.

Po izjašnjavanju o predloženim amandmanima, članovi Zajedničke komisije jednoglasno su usvojili tekst Prijedloga zakona sa usvojenim amandmanima i uputili ga u dalju parlamentarnu proceduru.

Također, usvojen je i **zaključak** kojim se Stručna služba obavezuje da dostavi prečišćeni tekst Prijedloga zakona s ugrađenim amadmanima, uz Izvještaj Zajedničke komisije.

Ad.2. Razmatranje inoviranog teksta Prijedloga rezolucije o odlaganju slanja svih BH vojnih i policijskih formacija u misije u inostranstvo do donošenja odgovarajućeg zakona i aktivnostima u ovoj oblasti (predlagači poslanici: Zlatko Lagumdžija, Jozo Križanović i Selim Bešlić).

Boško Šiljegović dao je uvodne informacije o predloženoj Rezoluciji i istaknuo da su predlagači ponudili inovirani tekst Rezolucije.

Šefik Džaferović istaknuo je da neće podržati Rezoluciju ukoliko predlagač ne izmjeni njene određene dijelove. Za njega su neprihvatljive tačke 1. i 3. , s obzirom da su protivne zakonskoj regulativi i postojećim rješenjima, dok su prihvatljive tačke 2., 4. i 5.

Momčilo Novaković također ne može podržati ovakav tekst Rezolucije. U tački 1. podržao bi situaciju kada određene aktivnosti nisu u skladu sa zakonom. Tačka 2. je prihvatljiva. U tački 3. ne bi trebalo uslovljavati već donesene odluke, ali bi bio za prijelog da se Parlamentu predoči cjelovit plan aktivnosti. U tački 4. prihvata cilj koji se odnosi humanitarnu djelatnost, ali nije za dovodenje djece iz Iraka, dok je tačka 5. prihvatljiva.

Vinko Radovanović predložio je predlagaču da Rezoluciju povuče, s obzirom da je u okviru prethodne tačke dnevnog reda usvojen Zakon koji regulira pitanja iz same Rezolucije.

Za njega su prihvatljive tačke 2., 4. i 5. dok su tačke 1. i 3. međusobno suprotstavljene.

Halid Genjac istaknuo je probleme u pojedinim tačkama Rezolucije. Naveo je da Parlament donosi određena akta, a da dom rezolucijom iskazuje svoj politički stav o nekom pitanju. Unutar Rezolucije ne može se reći da se odluka donosi, već se može iznijeti određeno stanovište. Stoga je on predložio da se u u prvoj rečenici tačke 1. izvrši preformuliranje na način da se Predsjedništvo poziva da šalje u mirovne operacije određene grupacije iz BiH.

Vinko Zorić predložio je da članovi Zajedničke komisije ne prihvate predloženu rezoluciju, jer predstavlja loše rješenje.

Jozo Križanović je potom istaknuo da je iznenađen ovakovom raspravom članova Zajedničke komisije s obzirom da su predlagači, u skladu sa prijedlozima i preporukama prethodne sjednice Komisije inovirali tekst Rezolucije. Rezolucija je u trenutku dostave u proceduru bila aktuelna i održavala je određenu situaciju koja se odnosi na slanje jedinice iz BiH u Irak. Također, cilj tačke 4. bio je u forsiranju donošenja odgovarajućeg zakona u ovoj oblasti, a što je trenutno prevaziđeno usvajanjem Zakona predlagača Momčila Novakovića.

Nakon okončane rasprave članovi Zajedničke komisije nisu prihvatili predloženu rezoluciju sa 7 glasova protiv i 3 uzdržana glasa.

Po okončanju rasprave o tačkama dnevnog reda **Boško Šiljegović** predložio je da se odrede članovi Komisije koji bi dali odgovarajuću izjavu po okončanju sjednice Komisije. Kako je prijedlog jednoglasno prihvaćen, za obraćanje predstavnicima sredstava informiranja određeni su **Momčilo Novaković**, **Adem Huskić** i **Vinko Zorić**.

Zapisnik sačinila:
Dragica Hinić

Privremeni predsjedavajući
Zajedničke komisije:
Boško Šiljegović

